


UNIVERSITY

C. W. Lang



COMMENTATIONIS
DE
SOPHOCLIS VITA
PARTICULA.

QUAM
AUCTORITATE
AMPLISSIMI PHILOSOPHORUM ORDINIS
IN
ACADEMIA FRIDERICIANA
SUMMORUM IN PHILOSOPHIA HONORUM
RITE OBTINENDORUM CAUSA
DIE V. SEPTEMBRIS A. MDCCCXXXIII.
HORA X.

PUBLICICE DEFENDET
CAROLUS GUILIELMUS LANGE
HALANUS
SOCIETATIS HISTORICAE SENIOR.

HALAE
TYPIS EXPRESSUM GEBAUERII.

100

Sophoclis vitam cum Lessingius neque a Baylio in Lexico histor. - critico, neque ab aliis viris doctis singulariter descriptam esse animadverteret hac ratione, ut, quidquid antiquitatis monumentis hac de materia proditum, quidve constitutum esset recentioris memoriae scriptoribus, colligeretur subtiliterque examinaretur: ipse etiam tum iuvenis de Sophocle quaerere primus instituit. Etenim recte iudicasse videtur Lessingius de iis, qui antea hoc in genere posuissent operam; quos, Gyraldum¹⁾ si exceperis, Meursium²⁾ et Fabricium³⁾, omnes dicit plura prodidisse corrigenda, quam quibus uti liceret. Priusquam autem Sophoclis Vitam perfecisset Lessingius, ipse vita perfunctus est; quod iure doluerunt Eschenburgius, qui mortuo illo Vitae huius Sophocleae fragmenta edidit⁴⁾, et libelli censor (Heerenius) in „Biblioth. d. alt. Litt. u. K.“ Vol. VIII. p. 122. sqq. Iam vero post annum MDCCLX., quo septem priores eiusdem vitae plagulae, etiamtum ipso curante Lessingio, typis sunt expressae, de singularibus Sophoclis vitae partibus, occasione data, subtiliter quaesivere viri doctissimi atque acutissimi Aug. Boeckhius, Godofr. Hermannus, Carol. Lachmannus, Car. Reisigius, Aug. Seidlerus, Guil. Süvernus, Carol. Wexius. Mitto alios; sunt enim multi. Ad quos accedunt, qui Sophoclis vitam paucis lineo-

1) Histor. poetarum tam Graecor. quam Latinor. dialogo septimo. — 2) Aeschyl., Soph., Euripid., s. de tragoediis eorum libri tres, p. 87. sqq., in Gronov. Thesaur. T. X. — 3) Bibl. Gr. I. II. c. 17. — 4) Primum edidit fragmenta singulari libello a. 1790. Berol. ap. Vossium et fil.; postea exprimi ea iussit in Lessingii operum collectione, edita ibid. a. 1793. Vol. XIV.

lis adumbrarunt magis, quam descripserunt; e quibus solos nomino Fr. Nevium, qui Sophoclis traegodias nuper edidit, addita commentatiuncula de poetae vita et scriptis; Aug. Guil. Schlegelium⁵⁾, C. Guil. Ferd. Solgerum⁶⁾, et Fr. Guil. Carolum Suckronem⁷⁾. Iam vero quae mei sit instituti ratio quodque consilium, vix est quod declarem. Atque ab initio quidem cum statuisssem lacunas tantum explere Vitae Sophocleae, cuius auctor est Lessingius: mox intelligebam, eiusdem Vitae fragmenta non solum egere supplemento, verum etiam emendatione. Qua quidem in re quanquam mirum quantum profecerunt subtilissimae virorum peritissimorum, quorum supra mentionem feci, quaestiones, ut arduum sit proferre, quae et nova videantur, et vera: nihilominus propter ipsam rei difficultatem maxime placuit in describenda tragici vita ponere tirocinium, eruditorum sententiis, quam fieri posset, accuratissime perpensis, emendatisque, ubi a veri specie recedere viderentur, additis denique, quae, ab illis omissa, ad Sophoclis vitam illustrandam valerent. Verum in hoc equidem specimine pusillo quaestiuncularum illarum, quas quo minus integras ederem, temporis prohibebat iniquitas, quod propositum maxime erat, ut etiam peritorum exspectationi satisfacerem: id an consecutus sim, nescio, vel potius me non consecutum esse scio; hoc tamen spero, ab iis certe scriptiunculam hanc qualemcunque probatum iri, qui e voluntate soleant eiusmodi censere conatus.

(noviss. edit. Vol. X.) — 5) in „Vorless. üb. dramat. K. u. L.“ I. p. 168. sqq. — 6) in praefat. interpret. German. — 7) Introd. Sophocl. in „Matthias paedagog. u. lit. Mittheil.“ Fasc. V. sqq. Magdeb. 1828.

CAPUT I.

Decem fere stadia¹⁾ ab Athenis aberat mons, Timonis turri, Platonis sepulchro eique loco finitimus, cuius nomen Platonis ambulationibus est nobilitatum.²⁾ Qui quidem mons, Thebanis Athenas proficiscentibus transeundus, commodum urbis adspectum praebebat.³⁾ *Κολωνός* dicebatur *Ἰππιος*, ne cum alio permisceretur Colono, in urbe ipsa sito, quem *Ἀγοραῖον* Athenienses nuncupabant;⁴⁾ ibique maxime colebantur Neptunus *Ἰππιος*, Minerva *Ἰππία* et Colonus *Ἰππιος*, antiquus heros; quorum numinum templa hoc ipso in monte prope Furiarum

-
- 1) Thucyd. l. VIII., c. 67. — Errat enim cum Meursio Lessingius Vit. Sophocl. p. 18. (B.), quod quattuor tantum stadiis distare Colonom ab urbe, ideoque δ'. pro δέκα scribendum esse apud Thucydidem, ex l. V. Cic. de Finn. c. 1. colligit. Cfr. Corsin. Fastt. Att. Vol. I. p. 206. sqq. Reisig. Enarr. Oed. Col. ad vs. 15. pag. XXVIII. — 2) Cic. de Finn. l. V. c. 1. Pausan. l. I. c. 30. — 3) Sophocl. Oedip. Col. vs. 14. sqq. — Quod quidem Colonus finitimus fuisse dicitur Academiae, quam ab Dipylō sex tantum stadia abfuisse Cicero testatur: Colonom progredientibus ab Dipylō ad Academiam conspectum fuisse in alterutra viae parte colligendum est. Rectā viā qui ex urbe in Colonom migrabant, haud dubie per aliam portam, cui *Ἰνπᾶδες πύλαι* nomen erat, egrediebantur; quam portam commemorat auctor Vit. Hyperid. in Plutarch. Opp. T. IX. p. 375. ed. Reisk. Cfr. Mülleri comment. in „Ersch's u. Grub. Encyclop." T. VI. p. 241. — 4) Pausan. l. c. Harpocrat. v. *Κολωνίας*. Gramm. ap. Thiersch. Actt. Philoll. Monacenss. T. I. Fasc. III. p. 355. Poll. l. VII. c. 29. §. 132. Schol. ad Eurip. Phoeniss. vs. 1701. — 5) Sophocl. Oedip. Col. vsa. 39. 53. sqq. et Schol. ad h. l. Argum. II. Oed.

lucum sita celeberrima erant antiquitus. ⁴⁾ Eodem in monte erat, ut alia mittamus, heroum in memoriam eiusdem Oedipodis conditum ⁶⁾, cuius suprema fata Sophocles fabula omnium, quas composuit, praestantissima illustravit. Namque Sophocles hunc priscum Thebanorum regem ab suis expulsum, a Theseo autem Atheniensium rege benigne exceptum illo in monte, quem adumbravimus, in ipso Furiarum luco tandem ad laborum omnium finem pervenisse finxit, gratum faciens non solum patriae suae, verum etiam pago, cuius ipse civis (*δημότης*) erat. ⁷⁾ Etenim ab illo Colono equite nomen traxisse dicuntur Coloniatae ⁸⁾, regionis incolae, qui pagum conficiebant *Κολωνὸν Ἴππιον*, primum quidem Antiochidi tribui, postea vero Aegeidi adscriptum ⁹⁾; huius autem ipsius pagi civem Sophoclem fuisse scriptorum antiquorum testimoniis luculenter comprobatur. ¹⁰⁾ Est enim iam pridem explosa falsissima Istri memoria, qui Sophoclem *οὐκ Ἀθηναῖον, ἀλλὰ Φλιάσιον* fuisse tradidit. ¹¹⁾

Col. Thucyd. et Pausan. ll. cc. Apollod. Bibl. III, 5. Eurip. Phoen. vs. 1701. — 6) Pausan. l. c. — 7) Argum. I. Oedip. Col. — 8) Sophocl. Oedip. Col. vs. 59. sqq. et Schol. ad h. l. — 9) Sic enim statuit Boeckhii Corp. Inscr. nn. 115. 172. 183. — 10) Cic. l. c. Suid. v. *Σοφοκλῆς*. auct. Vit. Soph. Chron. Par. l. 72. Argum. I. Oedip. Col. Schol. Aristid. p. 182. ed. Frommel. p. 485. ed. Dind. — De diversa scriptura *κολωνῆθεν, κολώνηθεν, κολώνοθεν* quae statuerat Osannus in Syllog. Inscr. p. 95., Reisigius redarguit praef. Enarr. Oed. Col. p. XXXIX. sqq. — 11) ap. Vit. Soph. auct. Haec autem verba: *οὐκ Ἀθηναῖον, ἀ. Φλ.*, cum antea quidem, uti Lessingius fecerat, Istro tribuissem ipsi propter verbum *γράφοντι*: Meiero V. Cl. placuit suam communicare mecum sententiam, quam hoc loco referre mihi liceat. Etenim fefellit fortasse Vitae scriptorem opinio, ut male intellectis Istri verbis de suo adderet verba: *οὐκ Ἀθην. ἀλλὰ*. Quod si factum est (fieri autem facile potuit in Vita, quam rectis-

CAPUT II.

Sophoclis patrem Suidas et Vitae auctor *ἀνώ-
νυμος* Sophilum fuisse referunt; quibuscum consen-
tire videtur auctor epigrammatis Anthol. Gr. T. I.
p. 168. ed. Brunck. (Anthol. Palat. VII, 21.):

Τὸν σὲ χοροῖς μέλψαντα Σοφοκλέα παῖδα

Σοφίλου, e. q. s.

ubi tamen metri causa restituendam esse scriptu-
ram *Σοφίλλου* rectissime monet Boeckhius Corp.
Inscr. Vol. II. Fascic. I. pag. 320. Etiam ab
Clemente Alexandrino¹²⁾, Tzetzta¹³⁾, et Marmoris
Parii¹⁴⁾ auctore *Σόφιλλος*¹⁵⁾ vocatur. Priori scri-
pturae favere videtur Diodorus Siculus l. XIII. c. 103.,
qui *Θεόφιλον* Sophoclis patrem nuncupat; quocirca
corrigendum censet Meursius, reprobante Lessingio,
qui *Σόφιλος* ac *Θεόφιλος* idem esse nomen arbitra-
tur, ob dialecti tantum varietatem duplici modo
pronuntiatum. Verum erravit Lessingius. Nam-
que sicuti Spartani, quique dialecto Dorica uteban-
tur, *Σιός* dicebant pro *Θεός*, et *Σίσυφος* pro *Θεό-
σοφος*¹⁶⁾: expectaveris potius *Σίφιλον* neque vero

sime Boeckhius dicit ex pannis esse consarcinatam) triplici ra-
tione Istri sententiam illustrare poteris. Namque Ister aut scri-
psit *Φλύεα* vel *Φυλάσιον*, ut pagos tantum confunderet, (for-
tasse *ἐγκτήματα* fuerunt Sophocli ap. Phlyenses vel Phylasios)
aut Sophoclem *τὸ ἀνέκαθεν* Phliasium, a Phlasiis civitate
donatum fuisse significare voluit. Mihi quidem coniectura,
quam secundo loco posui, quia illi maxime favere videntur
Vitae scriptoris ipsius verba, ita arrisit, ut ei me addicerem
sine ulla haesitatione. — 12) *Προτρεπτ.* p. 36. ed. Heins.
p. 48. A. ed. Sylburg. — 13) *Chiliad.* VI. vs. 69. — 14) l. 72.
— 15) Cfr. etiam *Arcad. de accentib.* ap. Bast. et Koen. ad
Gregor. *Corinth.* p. 580. ed. Schaef. — 16) *Biset. ad Ari-
stoph. Lysistr.* vss. 81. 1261. all. *Maittair. de Gr. l. dialecti.*
p. 147. D. Ed. *Imae.* p. 198. ed. Sturz. Schaef. et Koen. ad
Greg. *Cor.* p. 299. sqq.

Σόφιλον, eosdem nuncupasse eum, qui apud alias gentes *Θεόφιλος* audiret. At, quod iam Boeckhii¹⁷⁾ significavit, verum nominis *Σοφίλου* s. *Σοφίλλου* primitivum est *σοφός*; ut sit deminutivum formatum ad analogiam vocabulorum *Χοιρίλος*, *μύρτιλλος*, aliorum, de quibus vid. Matth. Gr. Gr. I. p. 217. n. 3.

Iam vero quaerendum est de re satis ambigua ac subdifficili, cuiusnam civium ordini adscriptus fuerit Sophillus. Ac primum quidem Aristoxenus et Ister, quorum sententias notavit Vitae Sophocleae auctor, in eo consentiunt, quod hominem operarium fuisse Sophillum dicunt: namque Aristoxenus dubium relinquit, utrum ille faber fuerit tignarius an ferrarius; Ister opificem gladiatorum eundem fuisse tradit. Vitae Sophocl. scriptor neutri fidem censet esse tribuendam; atque hanc quidem sententiam suam duplici ratione comprobare opinatur. *Οὐ γὰρ εἰκὸς*, inquit, *τὸν ἐκ τοῦ τοιούτου γένόμενον* (tam humili loco natum) *στρατηγίας ἀξιωθῆναι σὺν Περικλεῖ καὶ Θουκυδίδῃ, τοῖς πρώτοις τῆς πόλεως· ἀλλ' οὐδ' ἂν ὑπὸ τῶν κωμωδῶν ἄδηκτος ἀφείδη, τῶν οὐδὲ Θεμιστοκλέους ἀποσχομένων*. Quocirca Sophillum non ipsum fabrum fuisse, sed servos tantum aluisse ad fabricam artem facitandam ille arbitratur. Haudquaquam tamen hac argumentatione res ad liquidum est perducta. Namque quod primo loco posuit argumentum, Vitae auctor ipse redarguit, quod Themistoclem commemorat a comicis perstrictum, quia ignobili loco natus imperium bellicum obtinisset. Etenim Themistoclis matrem Thressam fuisse ferunt,¹⁸⁾ ideoque *νόθος πρὸς μητρός* dicitur Plutarcho.¹⁹⁾ Praeterea, ut aliorum mittamus memo-

17) l. c. — 18) Aelian, V. H. l. XII. c. 43. et Perizon, ad h. l. Tzschuck, et Harl. ad Cornel. Nep. Themistocl. c. 1. Athen. l. XIII. c. 5. — 19) Vit. Themistocl. c. 1. p. 111. sq. ed. Francof.

riam, Iphicrates, clarissimus Atheniensium dux, sutoris dicitur fuisse filius. ²⁰⁾ Alterum quoque argumentum, quo Vitae scriptor utitur, petitam ex silentio comicorum, haudquaquam certa exhibere veri indicia manifestum est; quapropter etiam hoc missum facere nobis licebit. Quod vero Vitae scriptor Sophillum non ipsum fabricam artem factitasse, sed servos tantum illam factitantes aluisse coniicit, Lessingii ²¹⁾ quidem sententia male fecit. Omnes enim, qui servos aluerint opificium aliquod exercentes, non fuisse primi ordinis cives, sed medio alicui civium ordini adscriptos („Klasse von Mittelbürgern“) Lessingius dicit, in errorem inductus verbis Pseudo-Plutarchi in Vit. Isocrat. init.: Ἰσοκράτης Θεοδώρου μὲν ἦν παῖς — τῶν μετρίων πολιτῶν, θεράποντας αὐλοποιούς κεκτημένου — ὅθεν εἰς τοὺς αὐλοὺς κεκωμώδηται ὑπὸ Ἀριστοφάνους καὶ Στράττιδος. Veruntamen verbis τῶν μετρ. πολ. non significari medii cuiuspiam ordinis cives, facile perspicies legens ea, quae paullo post idem ait: καὶ εὐπορήσαντος ἀπὸ τούτων, ὥς καὶ χορηγῆσαι, καὶ παιδεῦσαι τοὺς υἱούς; unde colligas, Theodorum neutiquam tenui censu fuisse, sed adeo τῶν πεντακοσιομεδίωνων. ²²⁾ Itaque μέτριος vocabulum non est ad ordinem aliquem civium referendum, sed ad cogitandi agendique rationem; quae singularis vocabuli vis declaratur a Boeckhio in Plat. Min. cet. p. 189. sq. et Stallbaumio ad Plat. Phileb. p. 90. §. 61. ²³⁾ Isocrates igitur, non quod operario patre

20) Suid. v. Ἰφικρ. — 21) Vit. Soph. p. 26. (C.). — 22) Choriagiam enim maximos postulassee sumtus constat inter omnes. Cfr. Boeckh. „Staatsh. d. Ath.“ I. p. 487. Wachsm. „Hell. Alterthsk.“ I. 2. p. 133. — 23) Cfr. Plat. de Republ. I. X. p. 592. E. Xenoph. Agesil. c. 11. §. 11. Sympos. 8, 3. de Republ. Lac. 14, 2. ed. Zeun. Plutarch. Apophth. Lac. XII, 6.

uteretur, sed propter officii genus tum Atheniensibus contemptum ²⁴⁾ a comicis perstrictus est, id quod manifesto significatur verbis εἰς τοὺς αὐλοὺς κειωμῶδῃται. Denique non meminerat Lessingius Demosthenem, oratoris clarissimi patrem, qui fabricam magnam habuit, et servos μαχαιοποιούς, a Plutarcho ²⁵⁾ τῶν καλῶν καὶ ἀγαθῶν ἀνδρῶν ordini accenseri. — Quae cum ita sint, non dubitamus in eorum abire sententiam, qui cum Plinio ²⁶⁾ Sophoclem, etamsi non princepe, certe tamen haud ignobili loco esse natum existimant.

CAPUT III.

Iam quaerendum est, quo anno natus sit Sophocles; qua quidem de re multum disputarunt VV. DD., neque conspirant antiquorum scriptorum testimonia. Ac primum quidem si Marmoris Parrii ²⁷⁾ auctoritatem sequare, ubi haec leguntur: ἀ[φ'] οὗ Σοφοκλῆς ὁ Σοφίλλου ὁ ἐκ Κολωνοῦ ἐνίκησε τραγῳδία ἔτων ὧν ΔΔΓΙΙΙ, ἔτη ΗΗΓΙ, ἄρχοντος Ἀθήνησι Ἀψηφίονος; natus erit Sophocles tertio Olympiadis LXX. anno, id quod Larcherus ²⁸⁾ et Solgerus ²⁹⁾ statuerunt sine vitii suspitione. Enimvero Marmoris auctor, si haec scripsit, et sibi repugnat et omnium testimoniorum memoriae. Namque lin. 78. haec habet: ἀ[φ'] οὗ Σο-

24) Cfr. Boettigeri comment. in Wielandi „Att. Mus.” I. (p. 279. sqq.) pag. 358. XIX. Barthélemy Voy. d. j. Anachars. III. p. 242. sqq. Aristotel. de Republ. l. VIII. c. 6. §. 1. Plat. Alcib. I. p. 106. E. Gronov. ad Gell. Noctt. Att. XV. c. 17. Plutarch. Vit. Alcib. c. 2. p. 192. — 25) Vit. Demosth. c. 4. p. 847. ed. Francof. — 26) Hist. Nat. libr. XXXVII. c. 11. §. 1. ed. Harduin. — 27) lin. 72. ed. Boeckh. vid. Corp. Inscr. Vol. II. Fasc. I. p. 302. — 28) Chronol. Herodot. p. 574. — 29) Praef. interpretat. Germ.

[φ]οκλῆς ὁ ποιητὴς βιώσας ἔτη [ΔΙΔΔΔΔΙ· ἐτελεύ-
τησεν, καὶ Κῦρος ἀνέβ [η ἔτη ΗΔΔΔΔΙΙ ἀρχ]ον-
τος Ἀθήνησι Καλλίου τοῦ Πρ[ο]τ[έρ]ου ³⁰⁾. Huic
rationi si fides est habenda, Sophocles natus est
Ol. LXX. a. 4., quem quidem computum omnino
congruere cum reliquis testimoniis postea videbimus.
Ex quo iam apparet corruptelam inesse priori nota-
tioni, qua Sophocles octo et viginti annos natus Ol.
LXXVII. a. 3. archonte Apsephione tragoedia vicisse
perhibetur. Iccirco sine ulla haesitatione putamus
aut scriptum aut certe scribendum fuisse Marmoris
auctori sic: — ἐνίκ. τραγ. ἔτων ὧν ΔΔΠΙΙΙ, ἔτη
ΗΗΠ, e. q. s., ut annus sit Ol. LXXVII. quartus.
Hisce Marmoris testimoniis congruunt, quae Vitae
Sophocleae scriptor habet: ἦν δὲ (Σοφοκλῆς) Αἰ-
σχύλου μὲν νεώτερος ἔτη δέκα ἑπτὰ, Εὐριπίδου δὲ
παλαιότερος ἔκοσι τεσσαρα; congruunt, inquam,
ubi cum Lessingio ³¹⁾ numeros ita commutas, ut
Aeschylō Sophocles minor viginti quattuor annis,
Euripide maior septendecim annis dicatur; qua qui-
dem medicina eget etiam Scholiastes ad Aristoph.
Rann. vs. 75. Sic igitur emendatis annorum nu-
meris ubi calculum subduxeris, Sophoclem efficies
natum quarto fere anno Ol. LXX. ³²⁾

30) Recte Palmerius Lydiatus et Boeckhius scribendum censent
δευτέρου. Prioris enim Calliae mentio iam facta ab Marmoris
auctore lin. 75. — 31) Vit. Soph. p. 32. (D.) — 32) Omnium
enim testimoniorum memoria Aeschylus natus perhibetur Ol.
LXIII. aut LXIV. anno quarto (cfr. Aeschyl. Vit. Boeckh. de
Gr. tr. princip. p. 47. sqq. Herm. Opuscul. T. II. p. 159.
sqq. E. R. Langii comment. de Aeschylō, in progr. Gynnas.
Frideric. Berol. 1832. p. 4.); Euripidem autem natum esse
Marmor Par. testatur Ol. LXXIII. a. 4. (lin. 65. cll. lin. 75.),
plerique verius Ol. LXXV. a. 1. (Diog. Laert. I. II, 45. Plu-
tarch. Sympos. VIII, 1. p. 717. C. Suid. v. Εὐριπίδης. Vit.
Eurip. ab Elmslei. post Bacchas edit. p. 172. Lips.)

Falsissimam autem ne Suidae memoriam omit-
tamus, Sophoclem Ol. LXXIII. natum esse referen-
tis, anni mentione facta nulla: admodum nobis pla-
cet, quod Wexius ³³⁾ Suidam coniicit in errorem
fuisse inductum aut male intellecta aut depravata
Olympiadis LXX. anni tertii notatione, qui annus
designatus fuisset apud eum, ex quo hauserit Suidas.

Revertor ad Marmoris Parii testimonia supra
commemorata, quibuscum plane congruunt verba
Diodori ³⁴⁾: *Περὶ δὲ τὸν αὐτὸν χρόνον* (Callia ar-
chonte, Ol. XCIII. a. 3.) *ἐτελεύτησε Σοφοκλῆς* —
— *ἔτη βιώσας ἑννεήκοντα* —. Consentiant igitur
Diodorus, qui Apollodori, ni fallimur, sententiam
exhibet, et Marmoris auctor non solum de anno,
quo mortuus sit Sophocles, ac de archontis nomine,
verum etiam de anno, quo natus sit poeta. Nam-
que cum dubitatione vacuum sit, Sophoclem fuisse
mortuum, antequam Aristophanis Ranae sit acta, ³⁵⁾
h. e. ante Gamelionem ³⁶⁾ mensem eiusdem anni,
quem supra significavimus: annis nonaginta retro
computatis Sophoclem efficitur natum fere intra
Gamelionem anni quarti Ol. LXX. et sequentis anni.
Iam vero apparet, nihil opus esse emendatione, ut
cum aliorum testimoniis Diodori verba concinant,
id quod Boeckhio ³⁷⁾ visum est.

Reliquum est, ut mentionem faciamus eius
opinionis, quam Vitae Sophocl. scriptor expressit

33) l. c. — 34) l. XIII. c. 103. — 35) vid. Aristoph. Rann.
vs. 67. sqq. all. Argum. III. Oedip. Cod. ed. Elmsl. in Actt.
Monacenss, I, 3. p. 324. — 36) Etenim quod Boeckhiius sta-
tuerat cap. XVI. de Gr. tr. pr. p. 204. sqq., Lenaeorum festum
Anthesterione mense celebratum esse, idem reprobavit com-
mentatione de Dionysiis, (Actt. Acad. Berol. 1817.) qua Le-
naea in Gamelionem incidisse comprobavit. — 37) Comment.
de Sophocl. Antig. (Actt. Acad. Berol. 1824.) p. 58.

hisce verbis: γεννηθῆναι δὲ αὐτὸν φασιν ἐβδομη-
χوستῇ πρώτῃ Ὀλυμπιάδι κατὰ τὸ δεύτερον ἔτος ἐπὶ
ἀρχοντος Ἀθήνησι Φιλίππου. Quam in sententiam
plane destitutam aliorum auctoritate scriptorum
abiire Fabricius³⁸⁾, Lessingius³⁹⁾, Boeckhius⁴⁰⁾, et
qui praemature nuper diem obiit supremum, Pas-
sovius⁴¹⁾; reliquorum praetermittere nomina liceat.
Neque illo argumento, de epiniciis petito, quae So-
phocles post pugnam Salaminiam Ol. LXXV. a. 1.
auspicatus esse dicitur, Vitae scriptoris sententiam
Boeckhius confirmavit ita, ut Marmoris ac Dio-
dori testimonia, quibus nos quidem fidem habē-
mus, redargueret. Quid? quod eandem Athenaei
et Vitae scriptoris narratiunculam prorsus favere
videbimus⁴²⁾ nostrae sententiae. Quia vero
Sophoclem VV. DD.⁴³⁾ anno Olympiadis XCIII.
secundo mortuum esse statuerunt (qua de re, tem-
pore nunc exclusi, alias disputabimus): Boeckhius
iam unice pendet ex Vitae Sophocleae loco illo, ubi
archontis nomen commemoratur. Huius autem ar-
chontis a nemine nisi Vitae scriptore mentio est
facta; nec proditum est ab antiquis eius archontis
nomen, qui Olymp. LXX. a. 4. eponymus fuerit:
quocirca Vitae scriptorem errasse colligimus in an-
norum numeris legendis aut computandis aut scri-
bendis; quod vitium saepius ab eo commissum esse
iam vidimus et postea videbimus. — Denique ut le-
vissima testimonia omittamus et Luciani⁴⁴⁾, qui

38) Bibl. Gr. T. II. c. 17. p. 619. — 39) Sophocl. Vit. p. 30.
(D.) — 40) de Gr. tr. pr. p. 102. de Antigona p. 58. Corp.
Inscrr. Vol. II. Fasc. I. p. 320. — 41) in Iahn. Annall. Phi-
loll. II. p. 154. — 42) vid. Cap. IV. — 43) Boeckh. ad Corp.
Inscrr. Vol. II. Fasc. I. p. 342. de Dionysiis cap. 20. annot.
120. Ritschl. de Agathone cap. 6. — 44) Μακροβίων c. 24.

nonaginta quinque, et Valerii Maximi ⁴⁵⁾, qui adeo prope centum annos natum Sophoclem obiisse tradit; quia haec omnia refelli certioribus testimoniis supra commemoratis persuasum nobis est: pro certo iam liceat ponere quem designavimus annum natalem Olympiadis LXX. quartum.

CAPUT IV.

Etiam si nullo scriptorum veterum testimonio confirmata esset eorum sententia, qui puerum existimant liberaliter institutum quibuscunque artibus ingenuum nobilique natum loco tum deceret: nihilominus ipsae Sophoclis tragoediae haud ambigua eruditionis perquam liberalis ac fructuosae nobis offerrent indicia. Verum diserte contestantur Ister et Vitae scriptor, musicis ac gymniciis certaminibus victorem esse Sophoclem renuntiatum. Quid? quod adeo reipublicae administratione probatum et legationibus tradunt; ⁴⁶⁾ quibus tamen si quis fidem habendam esse negarit, nihil impedio. Musicae autem ac gymnicae artis magistro clarissimo puer usus est Lampro ⁴⁷⁾. Cuius viri fama tanta fuit, ut cum laudatissimis musicis antiquitus compararetur. ⁴⁸⁾ Hoc praeceptore dignum sese prae-buit iuvenis eodem die, quo splendidissima Themistocles victoria de Persarum classe reportata cum reliquorum Graecorum, tum praecipue Atheniensium gloriam libertatemque constituit; eodem, inquam, die, quo Eu-

45) l. VIII. c. 7. §. 12. — 46) Auct. Vit. Sophocl.: καὶ ἐν πολιτείᾳ καὶ ἐν πρεσβείαις ἐξητάζετο. — 47) Vit. Sophocl. Athen. l. I. p. 20. F. — 48) Cornel. Nep. Epam. c. 2. Plutarch. de Mus. p. 685. Plat. Menex. p. 236. A., cui repugnat Athen. l. XI. extr. l. II, 6. p. 54. cfr. Lessing. Vit.

ripidem Salamine natum esse plerique putant, ⁴⁹⁾ Aeschylus autem eandem prope insulam cum Persis fortiter pugnarat. ⁵⁰⁾ Namque Sophoclem ferunt, eximiae pulchritudinis causa tum electum, cum lyra, nudum et unctum, aut, ut nonnulli tradiderunt, palliatum tripudiasse circum tropaea, epiniciaque auspicatum esse. ⁵¹⁾ Sedecim annos natus illo tempore erat, ut Wexius ⁵²⁾ fallatur, cui mirum quantum scrupulum iniecerunt verba Plutarchi ⁵³⁾: *οἱ πλείστοι τῶν Ἀθηναίων ὑπεξέθεντο γονέας καὶ γυναικας εἰς Τροιζῆνα* e. q. s., unde colligit Wexius, Sophoclem *τῶν ἐν ἡλικίᾳ* fuisse, quos omnes in triremes conscendisse Plutarchus tradit. Verum enimvero Vitae scriptor et Athenaeus nec Plutarchi ipsius verbis repugnant, nec gravissimo testimonio, in quo Lessingius ⁵⁴⁾ acquievit, Herodoti ⁵⁵⁾: *ἐνθαῦτα οἱ μὲν πλείστοι ἐς Τροιζῆνα ἀπέστειλαν, οἱ δὲ ἐς Αἴγινα, οἱ δὲ ἐς Σαλαμῖνα* —, quocum de Salamine prorsus consentiunt Diodorus ⁵⁶⁾ et Cornelius Nepos ⁵⁷⁾, quorum alter tantummodo Salamina, alter partim Salamina, partim Troezena asportatos fuisse liberos Atheniensium dicit. Quid? quod eodem die Salamine natum esse dicunt Euripidem, quod iam supra commemoravimus. Neque vero etiamsi prorsus nihil valeret horum scriptorum auctoritas, Sophoclem tum fuisse militem probari potest. Namque primum licet in illo reipublicae sum-

Soph. p. 35 — 47. (E.) — 49) Plutarch. Symp. VIII, 1. Eurip. Vit. ap. Elmsl. in calce Bacchar. et Thom. Mag. ap. Musgr. — 50) Vit. Aeschyl. Pausan. l. I. c. 14. §. 4. cfr. E. R. Langgii comment. de Aeschilo. p. 5. — 51) Sophocl. Vit. Athen. l. I. p. 20. F. — 52) Prolegg. ad Antig. p. 28. — 53) Vit. Themistocl. c. 10. p. 116. — 54) Vit. Soph. p. 49. extr. (F.) — 55) l. VIII. c. 41. — 56) l. IX. c. 13. — 57) Vit. Themistocl. c. 2. extr.

mo discrimine τοὺς περιπόλους quoque ponamus interfuisse pugnae, quos quidem in bellorum extra fines Atticae gestorum pericula vocare Athenienses non solebant, haudquaquam tamen Sophocles Ol. LXXV. a. 1. mense Boedromione, in quem pugna Salaminia incidit, ⁵⁸⁾ octodecim annos, ut Wexio videtur, sed sedecim, vel, ut aliquid ei largiamur, septendecim natus, igitur nondum ephebus erat. ⁵⁹⁾ Iam vero apparet luculenter, quam male se habeat Wexii sententia. Accedit, quod Athenaeus ⁶⁰⁾ Sophoclem tum eam aetatem egisse significat, qua pulchritudo iuvenum maxime splendere soleat; florentissimam autem usque ab Homero ⁶¹⁾ omnes Graeci dicunt τὴν ἥβην, eandem aetatem,

„Quae signat dubia teneras lanugine malas.“

Cui rationi congruit prorsus, quod Plato ⁶²⁾, haud dubie Atheniensium respiciens morem, per triennium praecipue musicam doceri iubet pueros inde ab decimo tertio aetatis anno. —

Non ita multo post magnam tragicæ arti Sophocles operam dedisse videtur. Etiam si vero consentaneum est adolescentem Aeschylī exemplo gloriaque incitatum esse, ideoque satis magnam eruditionis suae partem illius tragoediis debuisse: perperam tamen Vitae scriptor Aeschylō dicit

58) Herodot. l. VIII. c. 65. Polyæn. III, 11. Plutarch. Vit. Camill. c. 19., cuius mirere inconstantiam, c. VII. de Glor. Athen. p. 349. et Lysandr. Vit. c. XV. decimo sexto die Mynychionis ad Salamina pugnatum esse narrantis. — 59) vid. Boeckh. Ind. Lectt. Berol. aest. 1819. et in Seebod. „N. Arch. f. Phil. u. Pædag.“ 1828. Fasc. III. p. 50. sq. C. F. Hermann. in „Lehrb. d. gr. Staatsalterth.“ §. 123. (p. 230.) — 60) l. I. p. 20. F. — 61) Cfr. Il. XXIV, 348. Od. X, 279. al. — 62) de Legg. VII. p. 809. sq.

cit magistro tragicæ artis usum esse Sophoclem. Repugnat enim, quod apud Athenaeum ⁶³⁾ de Aeschylō indicat Sophocles: *ὅτι εἰ καὶ τὰ δέοντα ποιεῖ, ἀλλ' οὐκ εἰδώς γε*, quam sententiam ipse confirmavit Aeschylus ⁶⁴⁾, artem tragicam se non didicisse, sed tragoedias fingendi facultatem miro quodam modo divinitus accepisse professus. Denique Lessingius, cui his in rebus fidem habere par est, planissime redarguit Vitæ scriptoris sententiam, quod tragicam artem, paucis regulis exceptis, quæ tragoediarum bene compositarum cognitione multo facilius ac melius quam praeceptore adhibito comprehendere possint, doceri non posse demonstravit. Neque cum Sophocles adoleret, tragoediarum eius generis multa exempla iam in promptu erant, unde tragicæ artis regulæ colligi et in certum quendam ordinem redigi potuissent.

CAPUT V.

Primum autem certamen tragicum, quo fabulas docuit Sophocles, tam insigne multis est nominibus, tamque honorificum ipsi Sophocli, ut pluribus disserendum de eo nobis videatur. Quod quidem certamen Plutarchus ⁶⁵⁾ dicit eodem tempore commissum esse, quo Cimon, Scyro insula expugnata, Thesei ossa reportaverit Athenas, archonte Aphepsione, de cuius nomine et anno postea dicemus. Præterea Plutarchus refert hac ipsa fabularum commissione neglectas fuisse leges, quas hoc in certami-

63) l. I. p. 20. l. X. p. 428. E. F. — 64) ap. Pausan. l. I. c. 21. — 65) Vit. Cimon. c. 8. p. 483.

num genere Athenienses observassent. Namque archontem, in partes discedere spectatores videntem, sorteque adsignatos ex ipso populo, ut antea mos fuisset, arbitros constituere non ausum, ad Cimonem ceterosque novem duces, singulos e singulis tribubus electos, iudicium detulisse. Qua ratione Sophoclem victorem esse renuntiatum; Aeschylum autem, qui cum illo certasset, indignatum paullo post in Siciliam se contulisse. —

Illud autem brabeutas constituendi genus acceptum fuisse Atheniensibus, et in omnibus postea tragicorum certaminibus observatum, ut ab illo munere excluderentur omnes, qui stipendia nulla unquam fecissent, neque verbis comprobatur Plutarchi: *ἔθεντο δ' εἰς μνήμην αὐτοῦ* c. q. s., neque Aristophanis ⁶⁶⁾ versibus aliquot, quibus illa consuetudo perstringi videtur Lessingio. —

Iam inter omnes, quod equidem sciam, constat, Ol. septuagesima septima Sophoclem illud in certamen, quo primum fabulas docuerit, descendisse; de anno autem, quo hoc factum sit, mirabiliter dissentiunt, qui hac de re quippiam statuerunt. Namque Hieronymus ⁶⁷⁾ eius, quam designavimus Olympiadis anno primo, Eusebius ⁶⁸⁾ secundo, Marmoris Parii auctor ⁶⁹⁾ et Petrus ⁷⁰⁾ tertio certamen illud tragicorum adsignarunt; quorum sententiam refutare instituerunt Palmerius ⁷¹⁾, Bentleius ⁷²⁾, Lessingius ⁷³⁾, Dodwellus ⁷⁴⁾, Boeckhius ⁷⁵⁾, We-

66) Rann. vs. 1109. sqq. — 67) versione Chron. Euseb. ad Ol. LXXVII. a. 1. — 68) Can. Chron. ad h. a. — 69) lin. 72. — 70) Miscell. l. III. c. 18. p. 172. sq. — 71) Exercitt. p. 452. — 72) Dissertt. Phalar. p. 281. sqq. Opuscc. p. 308. — 73) Soph. Vit. p. 67. sqq. (I.) et Laoc. extr. — 74) Annall. Thucydd. p. 625. — 75) de Gr. tr. princip. p. 101. sqq. Ca-

xius ⁷⁶⁾); qui anno quarto Sophoclem primum tetralogia vicisse comprobant.

Ut autem, quibus maxime rationibus innitatur eorum sententia, cognoscatur, ad Marmoris Parii locum revertimur, quem cap. III. emendavimus. Apsephionem enim, cui in Marmore tertius Olymp. LXXVII. annus designatur, Apollodorus ⁷⁷⁾ archontem fuisse refert eiusdem Olympiadis anno quarto. Idem ex Plutarchi loco supra commemorato colligit Lessingius, qui quae Ol. LXXVII. a. 3. a Cimone gesta narret Diodorus ⁷⁸⁾, non potuisse perfici ante eiusdem anni finem, ideoque quarto demum anno tropaea constituisse Cimonem et Athenas rediisse demonstrat. Plane cum his convenit C. Guil. Krügero ⁷⁹⁾, qui accuratissime descriptis temporibus Dodwelli ⁸⁰⁾ et Clintoni ⁸¹⁾ sententias redarguit. Non igitur esset, cur Apollodori rationem, peritissimi temporum auctoris, in dubitationem vocaremus, nisi Plutarchus sibi repugnare videretur, quod in Thesei Vit. c. 36. haec habet: *Μετὰ δὲ τὰ Μηδικὰ, Φαίδωνος ἄρχοντος, μαντευομένοις τοῖς Ἀθηναίοις ἀνέειπεν ἡ Πυθία τὰ Θησέως ἀναλαβεῖν ὅστ' αὖ* c. q. s. ⁸²⁾ — Cum vero constet Phaedonem archon-

none Chron. et Commentar. ad Marim. Pat. vid. Corp. Inscr. Vol. II. Fasc. I. pp. 320. sq. 340. — 76) Prolegg. ad Antig. Sophocl. p. 28. sqq. — 77) ap. Diog. Laert. I. II, 44 cfr. I. IX, 41. — 78) I. XI. c. 60—63. — 79) „Ueb. d. Cimon. Frieden, in Seebod. Arch. f. Phil. u. Pädag.” 1824. T. I. P. 2. p. 205—237. (v. p. 228. sqq.) et in Clinton. Fastt. Hell. ad a. 469. — 80) Annall. Thucydd. p. 625. sqq. — 81) I. c. — 82) Perperam haec Plutarchi verba interpretatur Wexius Prolegg. ad Antig. p. 29. Cuius quidem verba haec: „Bene autem demonstravit Lessingius, commissionem istam et Aphepsionis praeturam in annum Ol. 77. non ter-

tem fuisse Ol. LXXVI. a. I. ⁸³⁾: quod oraculum iusserit sero factum esse Ol. LXXVII. a. 4. apparet. Etenim Athenienses gravi tum pestilentia conflictatos oraculum petiisse, illamque sedandi causa iussos esse Thesei ossa reportare in urbem suam, ex Aeneā Gazaeo Lessingius ⁸⁴⁾ adnotavit. Consequens est, nimis longum temporis spatium inter oraculum Atheniensibus datum et Scyri expugnationem a Clintonē ⁸⁵⁾ interpositum esse. — Verum Diodorus ⁸⁶⁾ Ol. LXXVII. anno quarto, quem annum Apsephioni adsignavimus, *Phaeonem* refert archontem fuisse. Quare unum eundemque annum Phaedoni atque Apsephioni tribuerunt Palmerius ⁸⁷⁾ et Lessingius ⁸⁸⁾, qui alterum illorum archontum alteri ante finem anni mortuo substitutum esse putant. ⁸⁹⁾ Cui con-

tium sed quartum reiiciendam esse, tum quia Cimon post ea demum, quae Ol. 77. anno tertio gesta esse referat Diodorus, Athenas redux factus tropaea *ibi* (?) constituere et commissioni illi interesse potuerit, tum quia Plutarchus Thesei Vita c. 36. Thesei ossa, *ad quorum*, ex insula Scyro per Cimonem Athenas advectorum, *sepulturam celebrandam illa commissio instituta erat* (?) archonte Phaedone a Cimone inventa tradit. (?) Hic autem archon a Dionysio Halicarn. (?)” e. q. s. — quibus cuipiam probentur nominibus, ipse videat Wexius. — 83) Dionys. Halic. Antiquitt. Roman. l. IX, 5. p. 1791. Diod. Sic. l. XI. c. 48. — 84) Vit. Soph. p. 81. cfr. annot. — 85) Fastt. Hell. ad a. 476. p. 34. Krüg. — 86) l. XI. c. 63.: ἐπ’ ἀρχοντος Ἀθήνησι Φάωνος. Dind. correx. Φαίδωνος. Boeckh. Ἀψεφίωνος. — 87) l. c. — 88) p. 83. sq. — 89) Mirum in modum Wexius, cum totum hunc locum, tum Lessingii sententiam vexavit. Etenim si Palmerii et Lessingii coniecturam probas, haec ipsa certe accommodanda est Plutarcho, „qui Phaedonem dicit archontem fuisse, cum oraculum illud ederetur, Apsephionem autem, cum Cimon Athenas rediisset.

iecturae si fidem neges esse habendam, equidem non video, quid sit reliquum, nisi ut Phaedonis nomen apud Plutarchum corrigas. Etenim Marmoris auctoritate nititur scriptura *ΑΨΗΦΙΩΝ*, unde Plutarchus habet *Ἀφειπίων*, ubi cum evanuisent duae litterae, Diogeni Laertio impositum est *Ἀψίων*; similiter in Diodorum irrepsit *Φαίων*, ex quo rursum eruditus aliquis liberarius, qui Phaedonem sciebat illo fere tempore fuisse archontem, apud Plutarchum Thesei Vit. correxit *Φαίδων*.⁹⁰⁾ —

Utcunque autem illud est: *Διονύσια τὰ ἐν ἄστει* fuerint necesse est, quo tempore primum in certamen conatus est descendere Sophocles; ὁ ἄρχων enim certamini praefuit Plutarcho testante.⁹¹⁾ Quibus tragoediis⁹²⁾ tum vicerit Sophocles, non est proditum ab antiquis; his autem tragoediis subiuncta fuisse videtur Triptolemus, satyrica fabula.⁹³⁾

90) Scripturae varietas obtinet apud oratores quoque (vid. Boeckh. ad Corp. Inscr. Vol. II. Fasc. I. p. 340.); dubium est, utrum in genitivo ω an o, in secunda vero syllaba ε an η scribas; certum, ψ primo, φ secundo loco ponendum esse. — 91) Cimon. Vit. l. c. Cfr. Poll. VIII. 89. 59. Schol. ad Aristoph. Acharn. vs. 1024. Boeckh. in „Staatsh. d. Ath.“ I. p. 480. — 92) Tetralogiā enim primum certasse Sophoclem, Boeckh. docuit de Gr. tr. pr. p. 104. — 93) Brunck. ad fragm. Cfr. Jacobs. in „Nachtr. z. Sulz. Theor.“ T. IV. P. I. p. 146. Boeckh. l. c. quos refutare instituit Welckerus in „Aeschyl. Tril.“ p. 514. et „Nachtr. z. A. Tril.“ p. 292., qui Lessingium in eadem, qua Brunckius, sententia fuisse opinatur. Verum falsus est Welckerus: Lessingius enim tragoediam esse Triptolemum putavit. (vid. Laoc. extr. Sophocl. Vit. p. 98. sqq.) Ceterum videat Welckerus, quomodo, cum reliqua fabulae fragmenta, tum hunc versum (Fragm. IV. Brunck. 531. Dind.) a satyricis vindicet:

Οὐδ' ἡ τάλαινα δοῦσα ταριχηροῦ γάρου.

Lessingius enim hanc fabulam Plinio ⁹⁴⁾ teste actam esse monuit annis CXLV ante Alexandri Magni mortem (Ol. CXIV. a. 1. ⁹⁵⁾): qua ratione Triptoleum efficitur actam anno Ol. LXXVII. quarto, quo primum fabulas docuit Sophocles.

94) Hist. Nat. l. XVIII. c. 12, — 95) Ideler. in Acti. Acad. Berol. 1821. p. 277. Chronol. l. p. 407.

SENTENTIAE CONTROVERSAE.

- I. Sophoclis verba, Oedip. Reg. vs. 227., sic reintegro:
Καὶ μὴ φοβεῖσθαι, τοῦπίκλ. ὑπ. e. q. s.
 - II. Quas Martialis xen. CXXIV. commemorat coronas roseas, e cera picta fuisse fictas perperam opinatur Böttigerus in „Sabina” P. I. p. 253.
 - III. Falluntur, qui quae de navigatione a Phoenicibus suscepta narret Herodotus l. IV. c. 42., vera esse colligunt ex iis, quae de solis statu ibidem referantur.
 - IV. Sophoclis versum, Oedip. Col. 42., emendandum arbitror sic:
Τίνων; τὸ Σεμνῶν ὄνομ' ἂν εὐχαίμην κλύων.
 - V. Tibulli versum, l. I. eleg. III. 63., corrigas ita:
Hic iuvenum series teneris immissa puellis.
 - VI. Errant, qui cum Boeckhio (ad Corp. Inserr. Vol. II. Fasc. I. p. 342. de Dionysiis c. XX. not. 120. cfr. Ritschl. de Agath. cap. VI.) Sophoclem Olymp. XCIII. anno secundo mortuum esse putant.
 - VII. Immerito Quinctilianus Instt. Orr. l. V. c. 10. p. 405. ed. Burm., Valckenarius ad Eurip. Phoen. p. 12., Klotzius Lectt. Venuss. p. 178. sqq., et Elmsleius ad Eurip. Bacch. vs. 508. tragicos vituperant Graecos, qui ad nominum propriorum etymon alluserint.
 - VIII. Pueros, qui in gymnasiis versentur, in versibus faciendis exercendos esse censeo.
-

